



KEBEREC



Volume 9

Erkit cī ēēn vuccianya etīmma kī etīmma 2020

Lūtēnīt cī tīn cīk Karu



Avaracī balna gaala cīk Laarimak kī eet cīk obbitik thōōth cī angīdī lōōgō cīk kali tīn cīk Īkaru ōrrōt, ĩthōng ĩtīngathō ōōt ūlūtīt tīn nīkē. Ajin balna nēēgē dōōlī ennei ne, nyia ĩngīdīt tīn cīk eet cīk adīman gōōl cī cuuk cīnīng

wo? Ennei doolia ne, athii ngatī kagawua ma ngī ēēn tīn cīk eet cīk adīman cuuk cīnīng, athī ne kaviryia balna abicie kūtūgī athī ne ōōwa Īkari ĩthōng kootia kataguthiha gōōla. Ma balna natē enehet eeti ne, ingidie tīna gwuak. Kitia thī ne, akatiōy yoko Īkari neekie, ma balna ma ngī kogineca ēē, kīcīnta thī Īkar nīkē ma ngī angīda tīna. Kitia ne, ĩnōōgō yoko cīk akaniay ēē, Kagamtaha thīna ivirit nēēgē nga kurukta. Kicaya ĩthōng kothii cī karukca ĩthōng kothi cī awurtothi nēēgē buu ĩcīnang. kootia thī tīn nīkē ĩthōng ma balna gōōla kitia ne dīcē tīna vēlēk ēēn maala dōō kōdē cīk eet cīk cuwak! Kitia ne ma ngī ēēn cīgīk buu nga katī kōvvō kacīn ōōlō, Kengeryia thīna. Ma balna ma ngī kōdōlana kōrōōk, katinyana ma ngī entehet eeta ne, agamtawu eet cīk cuwak tīn nyia? Kenteha ne, yoo monogo cīgīk? Avu bathī katī amirēnē. Avaracik baajiga kī ngaagī vēlēk kī gaala cīk Laarimak. Ulutia thīna ĩthōng tīna neekie athi ngatī ēēn cīk Īkaru dōō, cīk Laarim ōōgī buu tōō, cīk Dinkawu buu tōō kī cīk eet vēlēk cīk gōō ūūt tīn Loriyowa avuyiani tīna ĩthōng anycīk eeta Īkar kōōt woyyia kataliōī Kapatatīy. Ībīl balna thī nōō ahat cī Laarimo cī woyyia agamnyi gii ma ngī ulutiy tīna vēlēk.

Edeciay thōōth coo ngato.

Ōthōōtha Lolar John Hillary

Mīcīt cī kurawo Loriyowa

Amīcī nyīthōrōī cīk Laarīmak ōrrōt Loriyowa. Ayak mīcīt cīnīng ēē ngerintiok cīk meelīk, avī cī lōōgō wūk kīdīk wūk nga kōdōlanit erkinya ōmmōtō kī tōrkōnōm ĩthōng avī cī wūk nga kōdōlanit erkinya etīmma ĩthōng ayak wūk ēēn erkinya etīmma kī codoi kūūk ĩcī owu. Ngerintia ĩcī lōōgō cīk nga kōdōlanit erkinya ōmmōtō kī tōrkōnōm ēē, avī cī athī Yiang Kirath, Bulu Īthta, Rēd Īthkorpion kī cī athī Bonggo ĩthōng Lōgōtēy ĩcīk nganī kōdōlanit erkinya cīgīk ōmmōtō kī tōrkōnōm ēē, ēēn cīk ētēhēd eeti cīnīng cī obbi cī athī Lōngīdē ēēn etīmma kī tur ĩthōng nga kumuda cī nga atīya Napaha, Kimotonga kī Ngarica cīk ijiowa nē Loriyowa dōō nekio. ĩthōng ĩcīk nga kōdōlanit erkinya cīgīk etīmma ijiowa naboo Loriyowa dōō cīk ēēn etīmma kī tur. Lōgōōtēy ĩcī ēēn erkinya etīmma kī codoi kūūk ĩcī owu ēē amīcī balna ōrrōt. ĩthōng kōr cī balna amīnyī ngereniet ivitia eeta cīk avu aduwai eet thōōth cī mōrīth cī yoko obbi akuwa looc vēlēk athī kōrōna vaīrath wo ĩthōng ūbūcantiay kadi ngī agamnyi nēēgē vēlēk ĩthōng mēēlī naboo. Iriontīk yoko eeta ĩthōng entek ne, nyī nga obodecu. ĩthīktōy ūtūngīta ōōt evintioiwēy. Ennei eeti cīnīng cī agam ĩnōōgō ne kibili gii ma ngī ōthōōthē thōōth cī Mōōrīth cī obbi wo. ĩthōng kabinetī cīnīng cī lōōgō cīk makīk ēē ngatī athanine, athī cī obbi ēē ne, kagina mēēlī ōrrōt athi cī kaduwa ōōgī dōō ĩthōng kūtūngeha ōōgī. Athī ne, ma ngī ĩbīl thōōth cī mōōrītho kaa katī kūmūda ēēn kabinetī ĩthōng. athī ne kayahi ĩcīk kīdīk ēē buu cīk gōō ivitia ĩmīcīt ĩcīnī.

Edeciay thōōth coo ngato.

Ōthōōtha Lolar John Hillary

Weet cī kavunia òlòò


Òthòòthòy balna eeti cī obbi cī tehediok cī thòòth cī Laarimo kī cī obbi Jubatēy athī ne, òwē gòòl cī Juba ivitia ticcìa! Ennei kēnnē coo ne kòtòdana toko niyang? Ennei ne idimta gòòl cī òdòlanu Torit ìthòng kitionawung natē. Èlēmtoī thī balna ìthòng ūūk cī obbi cī tehediowu wo ìthòng ucuwana nyarobinya cīk òdòlan Torit ìthòng othoothiòy kī gaalinit cobbi cī mejelethu Loriyowa kijin macucioit ìmma cī agawòy Kapatatīy kikiyyia kinyiga ngiti eet weec ìthòng dīdī ūmūda, ikiyyia kotodia. Ma balna ma ngī kòdòlana Loko ēgērēthanē ngini ìmma cī tolomirio ìthòng ìdīmanit kùbūna. Ongollie balna nēēgē looc athī ne gērtha ngitio! kennei ne, “Gii ma ngī anīhacet eeta ìthòng urukteta, ma ngī avvu ìthòng idimitò ma ngī agamanet ijio, ma ngī ēēn eet cī looc coo kagawona katīna.” Kītīngathia kootia ma balna ma ngī arawothi Lòbērē, utuyia tūlūwūnya ògōī natē ìthòng urumtek cīk ayaha nēēgē Kapatatīy. Gii cī ayahanī tuluwunya ēē ēēn korton cī tabalī ìthòng aaburi kōr òrròt. Aviriet eeti anyia kegina labī cīk atī cūwaluanīy, kavunia ìthòng ma ngī karowothīca Torit, òdoitò tuluwunya wūk avu kapatatīy kōr. Emeryia yoko aneeta nyatarka kobokcie na tòòna ìcī aatē tūlūwūnya athī nē kaavē na, kennei ne “Kamiri” Muot macucoit kuuk tolomirie ennei gòònògī ne, athi ngatī uuku loogocio nyia, kennei ne kuuk gòò et ìmma kollin? Athī ne “Athīknē yoko.” Kennei ne, “Yoo ma ngī ògòòn noko kabaca nana” Ennei cī maakī cīnang buu ne “Abaca ūtūngtek” Athī ne “Ìdīmta thī nyarobinya cīk tuwulunya cīkkò” Èdēcī cī obbi ēē ennei ne, “Ma toko ma ngī kanyung nyarobinya, kootia naaga tūlūwūnya nun? Abūrī”. Kanycīha nyarobinya òòta. Ma balna ma ngī kovvoyyia ngatī abīlnī tolomirēta, kurumtowa kī et cī amacuc cī ìngathī ngereniet òkkò ìcī Juba kijinta kenteha ne, “Ngini wū gòò òtòdī eeta cīk Juba jang?” Enecet ne, ovvoyyu

katīngan ìthòng eginnu ìthòng? Kenecca ne kovvoyyia tī ngereniet. Athī ne abūnna anycangū limira cunung ìthòng iriot cannī coo. Kanycīha ìthòng kagamtaha cīnnī. Ma baa ngerethietīn cīnnī kotoddia, ma balna ma ngī karawothīca gòòl ēgērētha tolomire loronī cī agurut ngoroc kēēnga ìcī tolomiro. Aga nyiangū nē kīgō tūwayioiti ma ngī adūc tang wūnī thīgīc. Ilingling nyiangū dōò noko ìthòng itio tolomirie kēēnga kīcīnta ma ngī abacie kittia ne, athii cī kungnīcē ìnòònò dōò tiic, kitiothia naaga buu, kitionīca gòò thīk cīk ajin nē, kēcēbja gòò cīk adiim nē. Ma ngī balna ma ngī ecebei, katīnya ma ngī òròk tolomirie kotia jurrung ibalallē kī Nyekuc. Kòdòlanta thī jurrung kothii gii cī gerthe.

Edeciay thòòth coo.

Òthòòtha Lolar John Hillary

Nyaraga cī arūc eeta



Adīman balna eeta cīk ēhēēda nyaragēt cīk Laarimak thòòth cī nyaraga cī arūc eet kelemit thòòth cī Nyaraga cī Nyekuco Ngaricha. Èēn balna eeta cīk avvu

òmmòtò kī iyyio ìthòng dòòlī cīk thukulak kī limanniok cīgīk, dīcē eeta cīk oolu. adīman balna nēēgē baa ma ngī ēēn nyīlòī etīmma kòmmòtò, nyīlòk cī iyyio. Abīlī balna ma ngī ēēn codoi nyīlòk cī weec erkita ìcī ēēn vucciaknya etīmma kī etīmma. Ètērēanī balna nēēgē tehediowa cīk thòòth cī Laarimo wo liman, ēēn nēēgē iyyio ìthòng limanioiti cī Ngarichi cī naboo alawini dòòlī kī eet vèlèk Ngaricha, òò liman nīcē lawintia. Ètērēanī balna limanī, limana ìcī athī ne, ògòòn thòòth cī yaangieti kuu hadintia ìcī Nyekuco, edeemi thī balna limannioiti aduwai limannioiti ennei ne, katī ma ngī keegin eet cīk kòwòb thòòth cī Nyekuco, adiim ma ngī kathīrar

Nyaraga cī Nyekuco kitio thinneti cīgac thōōtha ĩcī kathīrar naaga. Niyiang dīhīm thōōth cī Nyekuco ma ngī kathīhī thōōtha ĩcī kathīrar naaga. Aliman naboo limannioiti thōōth ĩmma cī athī ne adiim Nyekuco ma ngī kōthōōthōy thōōtha ĩcī kathīrar naaga. Thōōtha ĩcoo athī ne “Niyiang nyatarka itiona nē ngērīnī cīnni cī odoi looc coo kabaitō kī eeta. Aduwa Nyaraga cī “Yoanē ngatī ēēn codoi tōōna ĩcī ēēn ōmmōtō kī weec.” (Yoanē 1:14.) Ōthōōth Yesu thōōth cī eet cīk arūmē kī ĩnōōnō kī katī kīthīraritō eeta ĩnōōnō ĩthōng ūrūmtē kī ĩnōōgō avuthita ĩcī eetu kī cī abīlkī ōthōōth thōōth cī kinyomoc cī vinowo kī gaminit cī kuluguawu. ĩthōng itin coo othoothihet Nyaragawa ĩcī Nyekuco kī ngērīnī. Ōthōōth nē thōōth cīnac ĩthōng athii cī ūlī nēdō, ĩnōōnō thī cī ōthōōthī nē ngērēnī Kiristo kī kēel eet kōbōdaī wūk udullie thinneti thōōtha ĩcī avuthit cī awum nē wo thōōtha ĩcī nyaraga cī Nyekuco ahaata cīnac cī kathīrara naaga. Ajin thī balna limannioiti eet ennei ne “Athīraricu niigia thōōth ci Nyekuco wo thōōtha ĩcunung Laarimo wo ōgōōn kūū?”. Ēdēcī nēēgē athī nē “Ikijiahet Nyekuci ageeta, monogo avī Nyekuci tōō. Monogo thōōth cī alimaniet paadīrī kī eet cīkkō ēhēēda thōōth cī Nyekuco wo ēēn dīdī. Edeciay thōōth coo.

Ōthōōtha Clement Lopeyok Joseph

Thōōth cī Nyekuco ahaata ĩcī yaangietī



Aliman balna eeti cī ēhēēda Nyaraga cī Nyekuco Laarimeyyiey ĩmma thōōth cī Nyaraga cī Nyekuco ahaata cī yaangietī, ētērēānī balna nē jinēnta ĩcī ajini eet ennei ne, “Ahaat cī yaangietī nin?” Ēdēcī eeta athī ne, “Thōōth

cī kōthōōth naaga wo. Edemīk naboo jurrung ehedīcē nyaraga ĩcī obbi ĩcī adiliothi dilat ennei ne “Ēēn thōōth cī owu, wū ētērēānī eeti thōōth

katī ma ngī aliman ma nga dīcca, kī kuduwa thōōth cī eet cī kīdīk kī cīk meelīk. Aduwai nē ennei ne, vatīkēy gōō ĩcīk abaaknī eeta, mēēlī baajigi loocu ĩthōng dīcē eeta cīk owoyyiay thōōth. Itori naboo nē athī ne, aduwacet tōōn cī Nyaragawo ēdēnya tiic cī adīman thōōth cī yaangietī kēel kirithtianīt kītlīthia lemintia ĩthōng ōthōōth thōōth cī ĩtorine tiici cī Nyaraga cī Nyekuco kelethianyay. Abullie thoothonniowa vēlēk gōōla ĩcī kathīrarī ĩthōng katī ma ngī othoothi thōōth cī Nyekuco. Athī ne, ma ngī kothii thōōth cī eet ōōgī cī ōkōbaniay thōōtha ĩcīnīng apīrna nēēgē.

Būlēnīt cī ōkōbanini thōōtha

- Anyet kagac thōōth kīthīhīt jurrung
- Abulie thōōth cī Nyekuco ma ngī eheedi kaa kēel eet kalayyiōī kelethianyay kī kēel eet cīk looc nīcē kīthīhīt katī ma ngī ebellie.
- Limaninti balna cī ēēn iyyio ēel eet cīk obbitik cīk kelethianyawu kīcīnīt eet vēlēk cīk kelethia cīnīng kōdē ma ngī ēēn eet cīk ebelliōy kōdē ngaay, dōōlī cīk kīdīk kōdē cīk obbitik katī ma ngī ijjiowa ahat cī ēēn Ririwac thōōtha ĩcī athīhī nēēgē jurrung. Kī yoko jinēntī cī ajinni eeti Laarim wo, cī athī ne, Eet cīgang kelethiawa cīk abacī thōōth cī Nyekuco? Ajin balna eet cīk avvu kōrōtha ēē, ĩthōng ĩtō nēēgē ne,
- Eet cīk rubentīk
- Baakciak
- Eet cīk nyaatīk
- Ngarēēta
- Eet cīk ngōōltīk
- Ōgōōn woccia nēēgē buu kijiokta ahat cī ēēn Ririwac ēē kuu? Athī nēēgē ne,
- Kaduwai ĩnōōgō
- Kaduwai ĩnōōgo kīdīc thōōtha ĩcī ēlēmī nēēgē
- Kōvvō kacīn ĩnōōgō

- Kēēl ĩnōōgō
- Kaduwai ĩnōōgō gerthetin cī merto
- Kaduwai ĩnōōgō thōōth cī Nyekuco.
Edecciay thōōth coo.

Ōthōōtha David Lokwatem

Diyimitin cī Liman cī dōōlī cī alimani thōōtha cī ahaat wū ngagini aduwacet thoothonniok cī meelīk cīk woyyia ĩthīnga gōō katī amūdai cīk kīdīk katī nga ariat eē tehedinet. adiiim eeta cīk aga ngatī ēhēdanē thoothonniok cīk ōgōn kī cīkkō wo nyī aharnu, anyi tehedineti iyaiintiok cīgac kūrūgīt

Iyaiinit cī kūrūth ci athī thaar Lokuyu



Abaak balna eeta ōlōō ĩcīnīng ĩcī dīcī ōrrōt. Avī balna kūrūth cī athī thar Lokuyu ĩthōng ūūk itilim amēē. Ma kōr ĩmma ūūk ūmūdothīk ngaa ĩmma ōlōō ĩcīnnī kī maac cīnnī. Anyakcie balna ngaa cī et nīccē ēē ĩthōng aamē idiim ma ngī utuway. Ahad balna cī maacī ēē athī ne, ma ngī aamnyi ngaa wo ĩthī turnanē cī rūgēt cīnnī. Ikiyyia kūrūth cī athī Lokuyu wo avu nēbu jonui. Idiim eeti neccie ma ngī apaha doolec kēēnga ĩcī ngaa cīnnī thōōng. Enek Lokuyu ne, “ tūūng da nō ngaa cunni wo. Arīk kabath loota. Cī gōō ma ngī aamnyi athii cī ēēn turnanēt cī rūgēt cīnnī

neccie.” Ōwō balna Lokuyu korokjiowēy alimanei eet thoothonniok cīk meelīk ōrrōt. Edecciay mīcīt cī Lokuyu wo ngato.

Ōthōōtha Karlo Dominic Lokolong

Iyaiinit cī lotebutho

Avī balna lotebuthi ĩmma ĩthōng ĩnīwothīk ahat ciithia ēdēcca vēlēk. Avvu ĩthōng ma ngī kathī ne kuukta, ēgēthī kēnē athī ne, guēēk. Ma balna ma ngī kūūngnya wo avir kīda katūk kadaak nēdō. Edecciay iyaiiniti cī lotebutho wo ngato.



Ōthōōtha Karlo Dominic Lokolong

Iyaiinit cī kūlūmo



Ba lōōla avī balna kelegiti cī athī Kūlūmī. Kelegit cī wuuni inyia ōrrōt. Abaak nē bononiowēy ĩcīk obbitik ōrrōt, baathiwēy. Adaak kūlūmī kēēna, gēēn cīnnī kēēna. Alīk balna gōō eeta kūlūmēt ōrrōt, adiiim mangī aruk kīi kubutanta kavurē. ĩthōng thī eeti cī ayak kavurē rūgūmōna, ēēn nē et cī irianī ōrrōt neccie, ĩthōng thī kavurē ēēn kaal cīk adīhīman rūgūmōn ōrrōt. :ithōng thī Laarima ĩcoo eeti cī nga kuruk kūlūmī athii cī ēēn et. ĩthōng ma ngī nga tūūwa athii thēk cī ekebinie Laarima. Edecciay iyaiiniti coo ngato.

Ōthōōtha Matthew Nariyie Loduko ĩthōng ēdēccak John Lopir Lokolong

Kōbadinit cī Kōrōna vaīratho

Gōōl cī kagamī kōrōok cī eet cīk agam tadīngōnī kōdē athīrari goolliok cīk tadīngōnak

1. Yelianīt kī thīraninet cī goolliok cīk tadīngōnak

- Aburthēt cī ello
- Ītīrōn cī ōdōī
- Katī ngī aadi tīvongi

2. Nyia kīdīhīmē gōōl cī katiye rēēna athii cī kawumōnī wo?

- Gōōl cī abūnna cī athii cī kijiowanī ĩtīrōn cī ōgōōn kī vaīrathī cī abīlkī kōrōna vaīrathī katī ma ngī kaatī rēēna athii cī kawumōy elletinēy kī eet ōōgī ĩthōng kahimit dūlūkūanīt cīk amūt ūngūē kī kūtūk katī ma ngī kaatī ngatī mēēlī eeta.
- Reenitin cī ēēn mītarnya ramma

3. Goolliok cīk kēnyēī ririny ōlōō

- Tūūny athīn dōōkīthī theebuna kī maamīy

4. Goolliok cīk enyeine ririnya

- Tūūnyēnētī cī athiinu dōōkīthī ēnyēī vaīrath athīnēy ĩcugunik ĩthōng eeli abīlnī gōōl cī woyyia anyīcē niia ēllē cunni mōōrīth.

5. Gōōl cī abūnna cī kēnyēī ririny ōlōō.

- Thūūtī gōōl cī abūnna cī ēnyēhē ririny dōōkīthī.

6. Goolliok cīk kagamī tadīngōn kōdē goolliok cīk tadīngōnak ōlōō.

- Duuk aheenin cīk abūnna cīk ēēn nyēgēlē nyēgēlē.
- Wūūd nyegerua wūk olotiay cīk meelīk.
- adiiim ngaagī doolenu woccia ma ngī anyi dōōlī kotorkoyiōy ĩthōng thī ma ngī ahimit

dūlūkūanīt cīk kabungi ūngūē kī kūtūk.

7. Gōōl cī kathūnī et cī adak tadīngōnī kōdē cī ayak goolliok cīk tadīngōnak.

- Tihim dūlūkūan cī kabungi ūngūē kī kūtūk dōōkīthī.
- Tūūny athīn nō ĩcī owu ĩthōng naboo katī ma ngī eelu et cī ĩmōrī ēē.
- Arīk et cī ĩmōrī ēē ciithia ĩcī abūnna ĩcī ayak bēlēth kōdē ooyi katūga.

8. Gōōl cī kayaī dūlūkūanīt cīk kabungi ūngūē kī kūtūk kūdūt.

- Tihim dūlūkūanīt wūk kabungi ūngūē kī kūtūk wūk adīmaniay attia vatīkēy vēlēk ĩcīk attē eeta cīk abīlkī ngiti tūwēnto, ngiti attē meelitini cī eetu kōdē ma ngī ōwō vatīkēy vēlēk.
- Tihimēntī cī dūlūkūanīt cī kabungi ūngūē kī kūtūk, eeli aniitia kī eet ōōgī gōōla ĩcī anyīcē kōdē ijjiowanē kagami tadīngōnī cī ōgōōn kī vaīrathī.

9. Gōōl cī kēbēī avuthit cī eeto.

- Anyīk et cī ĩmōrī ēē kaavu nēdō ĩthōng utuvuwu limira cī ēēn tōrkōnōm, tōrkōnōm, tōrkōnōm, tōrkōnōm katī ma ngī athii cī abūnna avuthiti cī eeto.

Edecciay thōōth coo.

*Ōthōōtha Gaala eeta cīk Taaliak (Akīmēta)
“Health Pooled Fund”*

Ma ngī adiiim agga eti thōōth

Ma ngī adiiim agga eti ĩmma thōōth coo tēhēēda nyarada coo thōōtha ĩcī laarim_project@sil.org
Kōdē avuyya kebintia ĩcī ngōōtua cīganīk ko 0916343342.



Golliok tur c̣ik ạṛicananē niia ēllē cunni moṛịtha ịc̣i atḥi kōrōna vạịrath



Ṛịcana ēllē cunni, eet
c̣ik kōrōok cunni ḳi eet
c̣ik looc cunni vēḷēk
mōōṛịtha ịc̣i atḥi
kōrōna vạịrath wo

Ma ng̣i adiimi ijjo^wa thōōth c̣i mōōṛịth
ṇịcco ruwēi akimēt c̣ik looc c̣i Thaa^wuth
Ṭ'hudani limirawa ịc̣i ēēn 6666



Tūūny athịn dōḳịtḥi
theebuna ḳi maamịy.

Ṇỵ agamonu ḳi eet athịnēy
ka^ti ma ng̣ịṛhawonu.

Avvu rēēna eetịnēy.

Mūūt kūtūk ḳi ūngwuē cugunik
dūlūkana kōdē ịṛịrek kōdē
tithioṇik rōkōl c̣i athiit cunni.

Avu ōlōō kōdē nỵ ōwō ka^ti ma
ng̣ị iitiri kōdē ma ng̣ị athịrari
golliok c̣ik tadingōnak.

